

四庫全書

集部

欽定四庫全書

集部

忠肅集

御製詩

卷一至五

詳校官庶吉士_臣張溥

檢討_臣何思鈞覆勘

總校官進士_臣程嘉謨

校對官檢討_臣王福清

謄錄監生_臣李 普

御題劉摯忠肅集六韻

散篇裒集還全璧世久湮淪傳始今

劉摯文集四十卷見於宋史藝文志

及馬端臨經籍攷世久無傳本今從永樂大典各韻中裒集編綴各體具備共得文二百八十五首詩四百四十三首以原書卷目相校尚可存十之六七云必有鬼神來呵護自然天地佑

忠忱未嘗釋卷於經邃卻匪空言見理深出處一身守
直亮是非兩字辨僉壬明陳十害邪辭闢分析二章正
氣森六百載餘惜悃篤裕陵見擯獨何心

欽定四庫全書

集部三

忠肅集

別集類二宋

提要

臣等謹案忠肅集二十卷宋劉摯撰摯字萃

老東光人家於東平登嘉祐四年甲科神宗
朝累遷禮部侍郎哲宗即位歷官門下侍郎
尚書右僕射以觀文殿學士罷知鄆州紹聖
初坐黨籍累貶鼎州團練副使新州安置卒

紹興中追贈少師謚忠肅事蹟具宋史本傳
其文集四十卷見於宋史藝文志久無傳本
今從永樂大典各韻中裒輯編綴以原書卷
目相較尚可存十之六七除青詞齋疏等文
十七篇謹稟承

聖訓刪削不錄各以類排纂釐為二十卷而仍以
劉安世原序冠之於首摯忠亮骨鯁於邪正
是非之介辨之甚嚴終以見愠羣小貶死荒

裔其為御史時論率錢助役之害至王安石
設難相詰而摯反覆條辨侃侃不撓今其疏
並在集中他若劾蔡確章惇諸疏見於宋史
者亦並存無關其所謂修嚴憲法辨別淄澠
者言論風采猶可想見固不獨文詞暢達能
曲暢情事已也至集中有訟韓琦定策功疏
論王同老攘功冒賞之罪而道山清話遂謂
文彥博再相摯於簾前言王同老劄子皆彥

博教之乞下史官改正宣仁不從彥博因力
求退今考此事史所不載而集中有請彥博
平章重事疏其推重之者甚至尤足以證小
說之誣蓋當時黨論交訐好惡是非率難憑
據幸遺集具在得以訂正其是非於論世知
人之學亦不為無補矣乾隆四十九年十一
月恭校上

總纂官

臣

紀昀

臣

陸錫熊

臣

孫士毅

總校官臣陸費墀

自來水

7

提要

原序

宣和六年七月六日宣教郎知開封府臨河縣丞劉跂
寓書於元城劉安世曰先人平生為文方棄諸孤僅存
一篋類次之已成編集念當有序引以信於後晚年遷
謫事同諸公身後怨家誣謗又蒙朝廷核實已賜昭雪
然而元祐大臣不幸亡歿者類皆不敢納銘於壙植碑
於隧始終大節不應無聞於後也願因集序并載一二
使他日有考焉顧惟衰拙自少受知於先丞相素叨國

士之遇中荷薦引寢階禁從晚歲遽謫復同憂患而又
被譴以來行三十年固窮守道俯仰無愧似不為知己
之辱雖懷自顧不足之羞而莫敢辭者蓋義之所在不
可得而避也公諱摯字莘老永靜軍東光人也幼而敏
悟有成人風年未弱冠被薦於渤海聲譽籍甚凡四預
鄉貢禮部奏名為第一復中甲科初始南宮已著風績
英宗詔二府各薦士充閣館忠獻韓公琦以應詔補公
館閣校勘王文公安石初秉政搜擇人材擢為中書校

正居月餘議論多不合會除監察御史欣然就職語家人曰趣裝無為安居計即上疏論亳州獄起不止小臣意在傾故相富弼以市進今弼已責願寬州縣之罪神宗皇帝勵精求治獎進臣下公既對面賜褒諭且問從學士安石即安石稱卿器識公對曰臣東北人少孤獨不識安石也因論人物邪正奏對移時上意嚮納公退益感遇恩所以稱因上疏論率錢助役官自顧人其事有不可勝言者畧陳十害切中時病會御史中丞楊公

繪亦論新政并公章下司農司農條件疏校遂劾繪與公險詖中懷向背有旨分析公奏曰臣有言責采士民之說敷告於陛下是臣之職也今有司駁奏遂令分析交口相直無乃辱陛下耳目之任哉所謂向背則臣所向者義所背者利所向者君父所背者權臣願以臣章及司農所奏宣示百官者定當否奏入不報明日復上疏極論時政遂罷御史落館職擬竄嶺外上不暇乃貶衡州哲宗皇帝嗣位宣仁聖烈太皇太后以祖母共政

見連年水旱西鄙未寧百姓勞散而國有大故當務休息遂散遣京城役夫減皇城司覘者廢物貨場罷戶馬等事皆從中出又戒敕內外無敢苛刻擾民已而進退大臣選用臺諫擢公為御史公受命之始即具以熙寧告神考之語復陳於哲廟之前兩宮聽納盡行其言曾未期月人情於變使天下有泰山之安而無一朝之患者公之力也公既被遇知無不言奸佞刻薄之更事狀顯著者公皆正色彈劾多所貶出中外肅然時人以此

欽定四庫全書

原序

包希仁呂獻可上察其忠義誠信可屬事任未幾遂大用馬公在中書一日內降畫可二狀其一裁節宗室冗費其一減定六曹吏額房吏請封送尚書省公曰常時文書錄黃過門今封送何也對曰尚書省以吏額事每奏入必徑下本名已久今誤至此公曰中書不知其他當如法令遂作錄黃初尚書令史任永壽精悍而猾與三省吏不能相數以奸弊告諸宰執呂丞相大防信任之時戶部裁節浮費後省裁定吏額皆論年未就呂丞

相專權狠愎盡取其事置吏額房於都省以司空府為局召永壽輩領之未嘗謀及同列也永壽見錄黃愕曰兩省初不與今乃有此即稟丞相命兩省各選吏赴局同領其事以是白公公曰中書行錄黃法也豈有意與吏為道地今乃使就都省分功何耶他日又持奏彙以丞相旨稟公曰吏額事今欲慎重而速故請徑下然未經立法欲三省同奏依致仕官文書法公曰他非其類也更當聚議明日呂相又袖彙屬色示公曰勢不可不

爾公不欲立異勉應曰諾其後事畢永壽以勞進官時
忱蘇安靜時憚皆遷秩有差於是外議喧然不平臺諫
交章論列以為事在後者成就已十八九永壽等攘去
才兩月而都司不用司勲格擅擬優例冒賞徇私章數
十上時公已遷門下每於上前開陳吏額本未此皆被
省者鼓怨言章風聞適實不足深言呂丞相亦以語客
曰使上意曉然者劉門下力也然自此忌公益甚陰謀
去之遂引楊畏在言路諫官疏其奸邪反覆章十餘上

竟不能回士大夫趨利者洶洶交訐其事於是朋黨之
論起矣公語丞相曰吾曹心知無他然外議如此非朝
廷所宜有願少引避丞相曰行亦有請是歲八月一日
奏事畢少留奏曰臣入處近列器滿必覆願賜骸骨避
賢者路上遣中使召公入對太皇太后諭曰侍郎未可
去須官家親政然後可去使者數輩趨入視事公不得
已受命頃之呂丞相亦求退不許明年公繼為丞相不
滿歲前日洶洶者在言路詆公竟去位朋黨之論遂不

可破其本末如此公輔政累年剛明重厚達於治道朝廷賴之及為相益總大體務守法度輔佐人主於無過之地其於用人先器識後才藝進擬之際必察其人性行厚薄終不輕授以職任故才名之士或多怨公公知之不恤也取人不問識與不識或多南士有以蕭望之鄭明事諫公曰楚士奈何笑而不答論者謂元祐相以來能以人物為意知所先後而無適莫者公為之首奏事上前言直事核不為緣飾多見聽用與同列語公平

不欺未嘗以私屬人人有所欲多憚公聞之公聞之亦
為盡力然終不以語也精力絕人遠甚一見賓客及聞
其語終身不忘事無劇易臨之曉然省吏每以事試公
不以久近區處如一言皆可復故三省事經公所裁定
者後皆遵用莫能改云趙彥若子敗官下獄彥若奏與
監司有嫌乞移獄他路言者論彥若罔上不實王鞏除
知宿州言者論鞏前在揚州不法彥若鞏皆公姻家也
語稍及公公請辭位章七八上遂遷就外舍詔遣近侍

宣召公入既對諭曰彥若輩輩事何預也言者皆謂交通邢恕及章惇之子牢籠小人為異日計公心知為言者所中不復自明謝曰臣愚闇招致人言願就貶責既退固請益堅乃罷相以殿學士守鄆給事中駁奏謂劉某忠義自奮力辨邪正有功朝廷擢之大位一旦以疑而罷天下不見其過并給事中罷之於是中外疑駭莫所知謂久之乃知言者雖多專以章邢事為媒孽初公家子弟與章惇之子相識因入都應舉而公家子弟亦

遊科場嘗至府第而言者指為交通之迹邢恕謫官至京師以書抵公公答以手簡其末云為國自愛以俟休復茹東濟為東排岸官數有請求而公不之許蓄怨甚久適見公簡陰錄其語以示言者言者繳上之且解釋云休復語出周易以俟休復者俟他日太皇太后復辟也劉某所懷如此蓋媒孽之語不一而此最為甚朝野憤之其後楊畏遂升從官搢紳共惡甚於虺蜴東濟亦除提舉常平諫官復論其素行士論不齒不宜任以監

欽定四庫全書

原序

司除命遂寢人情更以為快公天性高明不以己長格
物既貴恭儉好禮不改平素淳靜嗜書自幼至老未嘗
釋卷家藏書多皆自雋校得善本或手抄錄孜孜無倦
平居不親妄勝家事有無不以經意雖在相府蕭然一
室其後南遷不知者謂公不堪其憂親族門人乃知公
謫居自奉簡約與在相府無以異也凡有議論惟尚中
道不習異說不責苟難務在謹名教而已少好禮學講
究三禮視諸經尤粹晚好春秋考諸儒異同辨其得失

通聖人經意為多公文章雅健清勁如其為人辭達而止不為長語表章書疏未嘗假手凡奏議論說記序銘誌詩賦諸文章千餘篇次第著集為四十卷藏於家公自青社罷職知黃州又分司徒蘄州語諸子曰上用章丞相吾勢當得罪若章君顧國事不遷怒百姓但責吾曹死無所恨第恐意在報復法令益峻奈天下何憂形於色初無一言及遷謫也嶺表之謫公拜命即日就道惟從一子家人涕泣願侍皆不聽水陸奔馳見星乃止

欽定四庫全書

忠肅集
原序

至貶所屏跡不交人事亦無書自隨宴坐靜默家人具饌告之食則食喜怒不形意澹如也公年未五十即屏嗜慾晚歲南遷氣貌安強無哀瘁之色居數月得微疾公自謂將終戒飭後事精神不亂安卧而薨公既歿於嶺外所屬為公請歸塋於朝不許已而諸子坐廢家屬再徙他郡而不著罪於狀又無知其故者雖公亦不知也今上登極大赦天下公既歸葬而文及甫蔡渭皆貶湖州然後人稍知其事起於此初及甫持喪在洛陽邢

起謫永州未赴亦以畏在懷州數通書有怨望語及甫
又以公在中司嘗彈罷其左司郎官怨公尤深以書抵
怨其畧曰改月遂除入朝之計未可必當塗猜怨於鷹
揚者益深其徒實司馬昭之心路人所知也大意謂服
除必不得京師官當求外補故深詆當路者紹聖初怨
以示蔡碩蔡渭渭數上書訟呂丞相及公而下十餘人
陷害其父確及謀危宗社引見甫書為驗朝廷駭之委
翰林學士蔡京御史中丞安惇究治焉遂逮及甫就吏

欽定四庫全書

忠肅集
原序

九

而所通初無事證但託以亡父曾說之寃治所問司馬
昭謂誰及甫對意謂公也問其證據事狀則曰無有但
疑其事勢心意如此朝廷照知其妄獄事遂緩會公薨
聞猶用蔡京奏以不及考驗為辭但坐諸子而已時紹
聖五年五月四日也其為諸子叔復護喪還鄉里公嗣
子跂徑伏闕下上疏訴其事又持副封詣都堂叩宰相
韓忠彥曾布等皆取實封紫牘開視知其謬妄明白其
以語跂至建中靖國元年二月二十五日有旨文及甫

蔡渭所陳顯無實狀已行貶責紹聖五年五月四日指
揮更不施行然復公歿後讒謗所坐皆得解釋渭今改
名懋云崇寧元年正月癸酉塋公於蘄州須城縣太谷
山之原先塋之東曹國夫人任氏祔焉有詔特依前宰
臣例又除公壻通直郎蔡蕃知陽穀縣應副葬事送終
之禮極其褒榮四方觀者莫不歎息嗚呼公之厚德高
行追配古人嘉謨偉績播於天下士民者固不可勝數
今特取大節載之其餘非公出處所繫皆畧而不書八

月一日承議郎提舉南京鴻慶宮賜紫金魚袋劉安世
序

欽定四庫全書

忠肅集卷一

宋 劉摯 撰

制教

元祐三年御試進士制策

朕肇膺駿命涉道寡昧懼無以奉承太母之慈訓而彰
先帝之休德夙夜以思樂得天下之忠言嘉謀庶以濟
茲今子大夫羣至在廷朕甚嘉之蓋聞天之災祥以類

而至古之善言天者能推斯變以應斯事若合符節粵
自去冬大雨雪至於春二月不止人大失職廣罹凍飢
殍死者衆夫恒寒之罰久陰之異必有以召之其故安
在朕為政於茲四年蠲天下逋負輕征而散利苟可以
足下無不為者而民力猶未裕也捐金幣之厚廓信義
之庶以安邊柔遠而戎心猶未革也豈所謂至恩者未
可崇本務歟特施設之序或失其當歟官之流至多門
也舉天下之闕不足以居其人財之費至無藝也量天

下之入不足以為之出將革之乎或疑於傷恩將因之乎懼無以善後必有至道未燭厥中先王之時上之陰陽和風雨時下之稼穡茂衣食足官簡而士貴財通而禮行四夷歎附邊場安堵又何修而至於斯歟夫切而不迫緩而不迂朕非求空於言也蓋將考而行焉矣其悉心茂明之

元祐三年御試特奏名制策

朕觀先王之時道德一於上風俗同於下家有孝悌鄉

有忠信人人知禮義之守廉恥之行其進退斯有制取舍斯有分雖虞人也招之非其物則不往雖乞人也予之不以禮則不受習俗既成施於後世雖世衰道喪勢利出其前禍患臨其後而終不以易節故其姦雄或為之屈寇盜或為之避彼上之所以養之與士之所以自養者何道而至於此國家昭德塞違示人以不爭信賞必罰示人以好惡學士大夫莫盛於斯世然所謂道義重則輕王公志道修而驕富貴風之所被使貪夫則廉

薄夫則敦者其亦有是人乎朕欲使仕者不獨為貪學者皆知為已所以厲其節與其志蓋有道子大夫必其考古之所宜施於今者著於篇

元祐六年御試進士前策

朕聞六藝之教同適於治而禮樂為急制中以節民情導和以養民性政行斯二者刑防斯二者四達而不悖然後上下輯睦之一乎中和茲二帝三王所以昌也先皇帝悼道之鬱滯建官設屬以討禮文足雅樂必自郊

欽定四庫全書

志齋集
卷一

廟行之朝廷以風天下規模宏遠矣而美意未終澤不
下究朕奉承遺烈夙夜興寐嘉與宇內臻於斯路今夫
下之俗分守不明僭侈相勝家自為禮人不知樂自學
士大夫齊人編戶率以其意從事故是非生於貴賤隆
殺繫其富貧風俗流溢和氣弗兆昔者聖人雖未制作
必因先王之禮樂宜於世者用以教化是禮樂之於天
下不可一日緩也今頗欲考古今之宜剖經史之義立
為昏姻喪祭之文器服宮室之制隆雅頌之聲斥優侏

之音使習俗知節謬戾不作建中和之極以述成先皇
帝鴻業而其損益先後之序朕不敢知固以待周詢而
博訪焉子大夫以為如之何而可或謂解今之法而更
張之民將駭而難從姑因循其舊而徒加厲禁又終不
足以合乎先王之法度然考古便今必有中制焉昔漢
修三雍行大射調八音聽樂均號稱永平唐損益曲臺
制度亦盛於貞觀開元之間采其遺意概之先王之法
其亦有合於今乎不然史家所載前代之跡粲然具存

要必有可言者至於賈誼劉向其論深美而不見施用
房遷林如晦達於為政而不知禮樂其失安在乃若節
文度數其詳則有司能言之非所問子大夫也其推古
今之所以廢興與施於當世而宜者著於篇

奉敕擬上皇太妃冊文並繳進劄子

臣准敕撰皇太妃冊文臣詞學鄙陋不能鋪紀
皇太妃休德盛美上稱詔旨勉強以成冒塵聖
覽臣不任惶懼愧汗之至謹具繳進以聞謹進

維元祐二年歲次丁卯某月某日皇帝某謹再拜言曰
昔我神考迪祖宗休德孝以事親正以御家而天下化
之方是時皇太妃實左右內治以柔順誠敬奉事兩宮
以仁淑勤儉綏帥九御受祉上帝篤生冲眡以顧以復
以濟及茲俾獲紹統序欲報之德物無以稱竊惟人君
之行莫加於孝而孝雖四海九州之責莫大於顯其親
之名矧我神考厥有訓命予末小子敢不敬之茲用稽
合羣志思與義稱不勝至願謹奉玉冊金寶上懿號曰

欽定四庫全書

卷一

皇太妃恭惟皇太妃於詩書所載輔佐之道施於家邦
者備矣宜膺典禮丕顯徽懿上馬寧承崇慶隆祐之尊
下馬保安持盈守成之子永懷多福光照無窮某誠懼
誠忤再拜謹言

表

賀英宗皇帝即位表

祇膺先志昭履慶基凡在覆臨舉深欣戴伏以皇帝陛
下睿智天縱聰明日躋迪靈源之休祥抱五聖之仁孝

昊穹眷命主祀鬯以承祧正統傳歸大帝華而協德離
重明而繼照乾六龍以御天化政光華三靈泰定舜盡
循於堯道武能廣於文聲宅后膺符協謳歌之所載守
成保極與天地以無窮

賀神宗皇帝即位表

順承顧命寅踐丕圖大號四孚萬方一慶恭惟皇帝陛
下幾神明哲性德靖淵佑民作君宅天衷之所相守道
繼體一神器於有歸璿璣察而七政齊聖人立而萬物

金少府志卷之二
觀光符歷數之在不協人神之依違矣紹堯熙哉下武
潤色大業作者謂聖而述者謂明守成太平傳之無窮
而施之罔極

元豐八年賀即祚表

祇若遭訓嗣膺太歷詔命所逮罔不慰幸伏以皇帝陛
下聖質天授同符祖宗帝統有歸萬世永賴正位之始
四海欣歡

賀立皇后表

椒房懿德寶冊降衷慶溢宮闈歡騰宇宙竊以握乾垂
統必資助於坤儀理外宣風示光成於內治母儀斯備
婦順以明稽合舊章懋隆新制恭惟皇帝陛下繼承丕
緒紹復洪圖踵遐武之重光措函生於累洽先乎民物
明王者之至公及於閭門著天下之大義惟皇立配體
國承家載嗣徽音將以正心而逮下不加崇號無以示
民之有尊誕賜洪名榮褒淑德然家人利正講聞義易
之辭而君子好述載美闢睢之義自古所重於今足稱

位定壺中化成天下

賀安南捷奏表

威靈所被萬里收功凱捷布聞兆民賴慶臣聞聖人之
於征伐也用非得已先王之於寇敵也威然後懷物萃
聚而除戎時豐亨而致法蓋方飭治之既備故苟犯順
而必誅虞帝所以事有苗之征宣王所以有淮夷之伐
監此前載率於盛時恭惟皇帝陛下剛健體天休明超
古萬方順以無侮三靈和而允懷曾爾交蠻於我天討

跳齧肆於南土虔劉及於數州不示大刑曷懲不軌軍
聲振疊肅如金鼓之下天皇澤漸濡澤若雲霓之救旱
俄訖然而請命因示之以好生惟盛德所以成無戰之
征惟至誠為能有不殺之武出卓薄伐既奮蠻荆之威
俟後來蘇行奪西夏之氣海隅大定氛祲一清赫然盛
勲若無前古

謝監衡州鹽倉表

議令獻言知典刑之無赦原心觀過荷仁聖之有容貸

其餘生處以善地伏念臣稟生艱拙遭世盛明學不能窮理而知幾材不足趣時而適變晞名途以孤進濫文館之末遊和鉛何功索米逾歲間承人之偶攝掾於中堂旋誤聖知使備員於憲府仍職書林之舊就行御史之中始自愚臣前無故事方陛下繼承於五聖而國朝平治者百年力勤肯獲之田大解不調之瑟蒐拔羣材而審以器變使化百度而曠然日新臣於此時職在言路誓殫忠義敢避勢權寧以孤睽訐切拂衆而身危不

忍從容倡和負恩而速進狂愚自矢裨益無功故宿官
之日幾何而瞽言之罪非一至如均民而弛役因之率
戶而出泉雖慮始樂成者愚人之不知然損下益上者
先王之大戒卽條十害冀補萬分議臣見疑以為敗謀
而亂化清衷獨見知其有責而盡忠特徇以誠止容其
去橐臺閣之二職置瀟湘之一隅有祿食使之存全有
職事可以報效銜恩載幸揣分增憂此蓋伏遇皇帝陛
下察臣孤忠全國大體不惜散一夫之法庶幾留衆正

之門謹當上體恩仁期於必報下堅節義死而不渝

謝滑州到任表

去職逾年法初得調賜符出守恩賁過優內省叨踰竊
深震懼伏念臣之所領地實近畿自昔漢唐之要津為
今趙魏之孔道中間一廢新造未完河流方洪騁傳將
至荏蒲之嘯間發輿梁之繕始興謂宜得王尊之獲民
叔圉之治客消盜之術有如龔遂濟人之政賢如國僑
乃如愚臣學蘊昧陋資材濶疎幸遭睿明每備任使愚

有餘故專於盡瘁智不足故無以自休所向多艱豈堪
治劇單車虔命使道疾馳視人郡章猶或驚異諭上恩
旨固不歡欣此蓋伏遇皇帝陛下明道德以建太平修
法度以熙庶政謂孤臣之多所慮取拙者之或能勤敢
不祇力夙宵疾心事職况詔令明具止於奉宣德澤汪
洋易於究達庶慮覆幬之祉小効涓塵之勞

謝御史中丞表

無非常之才被不次之命叨榮自省震悸靡遑伏念臣

學誼樸疏稟資中下不佞薄聞乎大道竊思少補於斯
民念事君者先立身故不為枉尺然守義而弗知變故
未可與權孤負清時侵尋白首比者不遺於陞履使之
再冠於惠文無所建明謂宜澄汰忽起從於橫榻俾遂
正於中司此蓋伏遇皇帝陛下迪德聖神紹休祖考仁
心惠澤昭百姓而協萬邦大公至明開衆正而杜羣枉
主張孤蹇付畀紀綱仲山不吐剛而茹柔汲黯願拾遺
而補過期殫此節上報誤知

上太皇太后謝御史中丞表

粵自臺端起專憲席雖有故事曾無幾人何意孱愚遽
茲叨冒伏念臣奮跡寒陋逢辰盛熙多歷歲年每叨任
使竊慕古人之所立不知直道之難行無補事功動罹
罪悔晁錯之為遠慮或謂之愚潘岳之再免官皆由於
拙復塵風憲滋觸怨仇方俟曠官之誅顧蒙越次之寵
此蓋伏遇太皇太后陛下乾坤為德日月並明知臣至
孤譽無聞於左右察臣所論意不出於阿諛全付耳目

之司使冠紀綱之地任之隆則責亦重恩之厚則報敢
輕誓竭一心無辭九隕

辭免尚書右丞表

疊上囊封願收恩檢誠言可信本期十百之見從天聽
彌高敢避再三之有瀆伏念臣承學淺陋稟生拙艱難
久玷於名途無可稱之官闕紀綱執憲愧古人直清之
風帷幄行經乏名儒道義之益坐縻稍縻動畏議訶已
煩善貸之仁敢意非常之擢負且乘足以致冠名與器

敢謂假人方陛下明道德以建太平修法度以康四海
所與共此宜得何人自非廊廟謨明之才曷副庶陛下
俞之託今顧及於至陋是將強其不能伏望皇帝陛下
思國體之重輕在柄臣之賢否追選綸綍之命以釋冰
淵之危上不累知人之明下以息徼倖之望

上太皇太后辭免尚書右丞表

橫被殊恩擢居重任竭愚衷而引避邈宸鑒之未迴疊
降訓詞彌深隕越竊以進有德則朝廷為之尊任惟人

故公輔不必備此古今之所同慎蓋治忽之所由生臣
以一介之微遇四朝之盛比從末路驟玷中司志少慙
而不渝言多迂而難用莫逃臨照日俟譴訶豈期尚屈
於聖知更使參承於國論永惟縣薄敢犯是非身之僂
而升高將有笑者器既盈而必溢固其理然詎自愛於
捐軀益深憂於累國伏望太皇太后陛下慎重名器無
以假人眷求審明與之共政庶各安賢愚之常分不至
召中外之煩言持鑒至誠收還成命誓堅犬馬之志仰

報天地之仁

謝尚書右丞表

偃僂至於循牆空稽投命號令難於反汗竟致叨逾撫
心兢慙無地跼蹐竊以國家建夫三省政事行於中臺
稽古以董正厥官置丞以左右其長進陪四輔退率六
聯若網在綱如車有轄苟任人之非稱欲興治以何由
臣出於諸生藐然孤進外之更州縣筦庫之任內之徧
臺閣省府之游譽不足以償毀功不足以補罪為邦司

直晚備中執法之員正色指邪慙無古君子之節方俟
療官之黜敢期共政之圖倖有非常進驚不次比益皇
帝陛下孝於述事以丕承祖宗哲於知人以允蹈堯舜
物有可用菲下體而不遺積非以功薪後來而或上曾
是屑瑣冒滋寵榮臣敢不以道事君以身徇國義之所
在知無不為庶收銖髮之勞仰報乾坤之造

上太皇太后謝尚書右丞表

愚款既殫睿恩滋寵終奪匹夫之志遂塵四輔之班揆

分過涯當榮為懼恭惟太皇太后陛下以上聖之德撫
多難之時聲氣不動而邪正分堂幃不下而華夷治所
與同邦家之休戚豈不在股肱之二三宜擢異才以副
公望臣學不造於道義智不研於變通惟是樸直愚魯
之資安於所稟至於得失利害之際初不自謀謬長憲
綱無裨經幄方且憂虞於大譴豈期超預於近司力小
難勝器盈將覆此益伏過太皇太后陛下宅俊以翼嗣
聖至公以馭萬方謂孤臣之慮常深或能有達謂一人

之材不備無求其全特出聖明之知不緣左右之譽矧
由言路久輔政機昔之常所敷陳人將責其施設知之
亦允蹈豈非甚艱言之必可行敗不自勉惟矢心於忠
義以報德於生成

辭免尚書左丞表

竊以國之爵祿以待賢能士之進退必循名義有或異
此何以示民伏念臣繇力薄材至愚極陋比蒙誤寵擢
備近司乏宏遠之規模空銷疲於精銳未嘗小補方俟

天訶敢期恩憐更進位序考其歲月則既非久次課其
職業則又無顯勞倘輒冒居實干清議伏望皇帝陛下
慎名器以厲在位明是非以正有功深察誠言許仲愚
分無難反汗之命庶拯臨淵之憂

上太皇太后辭免尚書左丞表

寵厚恩深已憂於未報力小任重不可以有加敢過量
以貪榮輒叩閣而虔請臣誤遭識拔超真顯嚴慷慨大
忠初不自量其孤拙低徊寡術今皆不出於尋常竊祿

欽定四庫全書

忠貞堂
卷一

可慙黜幽是俟敗意包荒之度更推進位之恩況在官
之日幾何而宿業之勞未著懼人言之一起累國體之
非輕伏望太皇太后陛下於輔弼必觀其心於爵祿必
慎所與矜臣非矯偽之志免臣於顛仆之危特徇忱辭
收遷成命

謝尚書左丞表

朝有虛位宜名賢是求名無假人乃次第而進危於據
疾愧若負芒伏念臣學不足與有明道未至於無固事

君之義惟有愚忠涉世之疎真同強聒安能謀王體定
國論何以塞厚望稱明恩不狩獵而有羆久慙尸素譬
江湖之集雁無繫少多未謫曠官更叨進秩隨增封戶
之數並益氷淵之憂此益伏遇皇帝陛下紹休祖宗同
德天地常體道以為用故萬物曲成不求備而與人故
小材無棄致茲孤拙常冒寵靈敢不激昂大忠奮厲懦
志庶有一得以補萬分

上太皇太后謝尚書左丞表

進位一等自訟於無功詔班十行趣使之就列恭於承命惕然為憂伏念臣足以諛聞暗於大體親逢聖運濫跡天臺出於流離孤塞之餘任以左右弼諧之責斷斷自守畧無他奇落落難成空嗟懦志位高祿厚功少過多方近輔之惟人坐期汰礫會左綱之虛次乃使續貂進其爵封益以戶賦控辭勿固祇服若驚此蓋伏遇太皇太后陛下以任姒之聖仁即唐虞之休治知臣有忠於所事之節察臣無善自為謀之私容之以底其成進

之以屬其志臣敢不以禮以義惟幾惟康庶收塵向之
勞仰報生成之造

辭免門下侍郎表

勞能不聞名品益進懼必投於顛仆敢冒貢於誠情臣
進德不强造道甚近逡巡尺寸之守遭會聖神之知以
負丘山莫報之恩初無絲毫可紀之善粵參天政乃令
驟至於四遷升寘東臺所歷遂周於三省益高股肱之
任况備喉舌之句爵視上公邑增真食倘因功而濫處

實累國以起羞伏望皇帝陛下如日燭幽體天成物察
臣底衷之既盡矜臣器量之已盈特收誤恩以允清議
上太皇太后辭免門下侍郎表

發政西臺無裨於聖治陞班東省忽霈於恩書揣分未
安控詞自列惟先王制爵祿之等以待賢能而君子謹
進退之方必循禮義臣起於寒晚躡至顯嚴獨恃聖明
特達之知不緣黨友更相之助歷塵近輔更涉累年愚
於直者人情之易睽公而固者衆怨之所聚每幸仰蒙

於善貸保此孤危豈敢更冒於誤恩遷其位叙上垂朝廷陟明黜幽之典下致臣子見得忘義之譏伏望太皇太后陛下慎名器以申大公明勸懲以厲百辟收還成命改授有勞

謝門下侍郎表

輔政備員久無功於右省冒恩進次預出令於東臺懇至偃牆終無反汗臣資蘊不足拙方有餘雖心危而慮之深然力小而任已重謂之事道而有愧乎聖賢之方

至於徇公或以負於天地之鑒士無可述聖有所姑保
全已費於至仁叙擢更碩於異數况夙夜出納之地以
侍從駁正為官授之非人凜若無地此蓋伏過皇帝陛
下明見萬物道御四海體貌之以厲其心馴致之以底
其績敢不寃事君之大義庶以報含物之異恩

上太皇太后謝門下侍郎表

才屢試而已窮位每遷而逾重弗容慙避徒積憂危臣
力不逮心名常浮實猥以口耳之學遂玷股肱之司初

不自量實拳拳於謀國迄無所就徒碌碌以因人此宜
清朝汰斥之必加豈復要地褒升之敢冀矧今左省乃
古納言審王命之允而復行受國事之成而不作均為
執政尤號近司夫豈孱愚所宜叨冒此益伏遇太皇太
后陛下躬任姒之德御成康之朝忘已之聖而資於愚
取人之長而略其短吹噓成就至哉造物之難酬寤寐
勤勞惟以捐軀而自誓

辭免右僕射表

揆席以虛治廷敷號猥及非才之錄又驚羣聽之公敢
冒至恩輒忘素守臣愚竊以論相雖人上之職得賢乃
太平之基必先含德之老成或待遠方之持起伏念臣
本由疎賤叨真顯嚴備數通臣獲進帝王之說預聞大
政顧慙禮樂之文堯作章而繼成漢分府以方重謂宜
簡斥更辱延登夫褒德者天下之大公而竭節者人臣
之常分念蚤塵於機要已久席於高華美事屢遷乃能
畢力威望匪重將取侮於四夷智畧更疎無可言之十

事苟從昧進昌慰具瞻儻選於衆而求之多出於臣之
右者伏望皇帝陛下慎名與器以尊朝廷紹德選勞以
勸臣下俯徇富平之懇曲成考父之名收還過恩庶允
清議

上太皇太后辭免右僕射表

數告於廷疇咨以位惕然驚汗浹於愧顏竊以師長百
司位隆於端揆權輿大政地重於西臺進德則朝廷尊
當賢則臣下服而臣學不足以斷國論才不足以達事

經孤奉恩私稽留歲叙處非其據者已久受過其量而
莫勝方興引分之言冀逭妨賢之責敢期含垢更使代
工倘懷苟得之圖妄作自賢之行公器不嫌於多取豈
曰知難高位必致於疾顛安能圖報上則詒盛朝之累
下則躡衆正之資伏望太皇太后陛下別擇臯夔改圖
丙魏登寘宰路使東國成大明庶物之情不奪匹夫之
志亟收渙渥以息煩言

再辭免右僕射表

辭受匪輕殫愚誠而自列訓詞申教邈天聽之逾高敢
授稽命之誠冀鑒由衷之請恭以皇帝陛下以盛德紹
天地以至孝承祖宗恭默無為方在持盈守成之日左
右同體宜得秉道明義之臣如臣學術甚疏智謀弗競
雖事君之義固守不移之愚然陳力以來初無可紀之
善父尸官而謗積蚤多病而志銷當返田廬遽躋鼎鉉
無楊綰之德必不足以化在位非臯陶之舉必不足以
遠不仁徒召煩譏上孤渙渥伏望皇帝陛下念輔臣之

當否繫國體之重輕特照孤忠曲全晚節敗還成命改授真賢

再上太皇太后辭免右僕射表

微志未伸誠言難止倘獲安於名分其敢追於典刑恭以國家之輔相難其人臣子之進退必以道益治忽之所由繫而榮辱之於是生臣遭會四朝周旋三禁感慨忠義常見古人白璧不為之非風采功名愧乏大臣巖石具瞻之望畧無報効久俟譴訶遽聞猷告之音摧寘

宰司之重力不勝任實憂代斲之必傷樞而非高將有
指頂而見笑下招覆餗之辱上玷知人之明況有廟堂
之耆明而多中外之俊又改疇公望乃協師言伏望太
皇太后陛下昭鑒至誠保全晚節使器盈者不至於溢
植躬者亦足以支特反誤知庶無虛授

謝右僕射表

恭以周王之慎令不反惟行雖如安世之自量深辭弗
得竟塵非據伏積內憂竊惟命相之難為邦所重粵五

帝三代而後逮兩漢有唐之隆蔚然多賢昭於方冊惟
皇盛世尤慎此官君臣賡歌今百三十載勲業繼踵裁
五十二人上之職在理三光而調四時下之責以鎮百
姓而遂萬物苟非選道德高世之望何以紹今古得人
之光如臣至愚於世孤進先朝過聽擢臺閣省府之華
二聖誤恩寘輔弼疑丞之地位高徒聞於播惡德薄不
足以尊朝功少過多怨叢謗積未詔士師之議遽咨端
右之遷名與器是謂假人負且乘殆將致寇已循牆而

至偃終渙汗以難安謂如臣宣為愚莫避漢廷之公議
曰俞咨益汝往終非虞帝之命官危不自遑凜無所處
此蓋伏遇皇帝陛下保龜鼎之重稽祖宗之謀體堯之
在知人本湯之不求備臣敢不究事君之義厲報國之
忠雖燭火無補於大明然駕馬可勤於十駕庶收塵露
仰答乾坤

上太皇太后謝右僕射表

使節皇皇臨門而慰寵詔詞壘壘申命之丁寧雖考父

之益恭慙富平之竟拜竊以百揆之任師長於中臺萬
事之幾本源於右省用道德之望則可以總方畧而廣
教化非賢明之選則何以制號令而平典章臣可與小
知無他大畧會兩宮之識拔允三府之推移勞不足以
償罪尤譽不足以除譏謗黃霸見謂功名之已損貢禹
徒以質直而見嘉區區其間錄錄何有請避賢路嘗投
劾以自言終貪國恩復尸官而未去敢意非常之寵遽
膺爰立之求並進秩勲益敷封食三篇納誨遠慙傳說

之來十事可行近愧姚崇之進顧視圭組若臨冰淵此
蓋伏遇太皇太后陛下躬任如之儼音翼成康之嗣聖
數求忠直保人成平臣敢不職思其憂義之與比安社
稷為悅期勉慕於前人非堯舜不陳庶答揚於休命

忠肅集卷一

欽定四庫全書

忠肅集卷二

宋 劉摯 撰

表

謝賜資治通鑑表

來事之師莫如稽古作者謂聖嘉此成書思前訓之共
由教有司而申錫敢期孤淺曲被寵榮竊以帝王之道
雖同治忽之時不一史惟廣記欲俾後世之多聞書不

勝繁常患當年之莫究簡則易治統之有綱恭惟先朝之緝熙遂詔名儒而論次網羅乎數千載之事潔齊於三百篇之中類集羣書劉邵上皇覽之要發明舊典譙周成史考之篇祕以名山之藏進於華光之讀今期傳信更及分頒此蓋伏遇皇帝陛下聖學日新孝思善繼亦既省觀於座右又將訓迪於臣工曾是哀愚預叨恩禮學如皇謚方興表借之心能愧班游遂有家藏之幸臣敢不玩篇籍之載求臣子之宜考終始以擇是非因

成敗以昭勸戒庶見古人之大致少副盛德之萬分

謝生日賜羊酒米麪表七首

恩班中禁慶集私門每於生育之辰膺此便蕃之寵義
無以避情不自遑臣既斲而孤為貧以仕賦分涼薄逢
時盛明遂以斗筭之微越承廊廟之任設孤復旦自傷
弗逮於親存頌餽示恩敢謂不緣於人廢綸言溫厚使
節光華將內府之醪牽兼太倉之穡麥禮雖有舊恩實
非常此蓋皇帝陛下守位曰仁使臣以禮道契兩儀仁

函萬類恩爰慶賞槩及疎愚盡鹿鳴之心非徒推飲食之惠効天保之報願以致岡陵之崇

璽書將訓玉府班常發為好賜之仁寵及誕彌之日拜嘉興感揣分戴慙伏念臣學本小知器難遠用幸遭聖明才不求備之旦亦玷左右民所具瞻之司惟涉事多艱故易銷於精銳而尸官既久徒自積於謗譏留顯絀而未行識包荒之已厚尚矜舊物曲記始生皇乎使節之光華肅傳天語餽以公臺之儀物榮發私門此蓋伏

過皇帝陛下謹六聖之典章本二儀之亭育亦既飲食
推所以燕嘉賓之心繼之廩庖行所以養君子之道顧
惟極陋孤奉至恩誓堅忠義之持仰報生成之施

誕育紀辰方起思親之感匪頒錫福遽瞻遣使之華餐
牽有加醪醴惟旨伏念臣志愚於古材散而蟠越承共
政之圖曾乏尊朝之德留連歲月辱三禁之四遷窮竭
技能無萬分之一補竊位之刑未正匿瑕之澤已深會
析木之集辰實左弧之紀日取期眷記特沛訓詞馳酒

正之上尊綴饗人之厚隲歲膺慶式幸積私庭此盛伏
過皇帝陛下體貌四鄰興行百禮嘉與四海同忠厚之
政惠及臣下得燕樂之心不緣無能而廢故事祿不逮
養虛饗推食之恩進思盡忠豈獨屬饗之幸

猥以誕辰上紆睿眷敕公臺而發餽賁私室以為光拜
受以還兢慙莫喻臣越從羈冗誤被延登徒彈小知無
補興運下考清議未免竊位而妨賢仰賴至仁有以包
荒而含垢敢謂此日記其始生方懷顧復之恩遽拜匪

頌之渥此益伏遇皇帝陛下體貌近輔勸養衆材飲食
已盡其心既冒嘉賓之賜福祿以報其上敢忘萬壽之
歌誓竭忠愚用酬覆燾

生育復辰方起思親之感光華遣使遽膺錫福之仁內
自省循莫勝慙懼臣志雖慕古慮不極深區區歲月之
間錄錄弼諧之地上焉萬分之何所補下焉多士之無
所稱尚容素餐已愧善貸豈謂門弧之舊旦更頒函詔
之深詞餽以餽牽勞之酒醴此益太皇太后陛下道成

萬物公御羣臣推所欲以及其私不以人而廢其禮祿不逮養空饗儀物之豐孝可移忠惟誓捐糜之報

使節皇皇詔詞噩噩賁以匪頒之數寵其誕育之辰內惟至愚曷稱優渥臣本非遠業偶玷近司雖葵藿自然知傾於委照而腹背之細何益於高飛素餐懷不稼之憂肉食甘無謀之誚未蒙澄汰更辱眷存祿弗及親方感門弧之旦人無廢禮亟蒙臺餽之恩授受以還進退無所此蓋伏遇皇帝陛下德冒萬物政稽二儀欲以盡忠臣之心推此養君子之

道予以馭其幸仰戴于至仁忠可移于君誓堅于素節
臺之有魄本所以養賢辰及始生誤叨於錫福感深銘
骨愧極汗顏臣幸遭異知擢備近輔事君以道福敢取
於容容當官而行功不聞於赫赫空饗優廩日懼大詞
尚煩推食之恩政及設弧之日茲惠之渥見於訓言餽
醴之豐榮於私室此蓋伏遇皇帝陛下體天丕冒合日
大明道成乎物而不遺禮不為人而或廢欲養不俟常
拜賜而念親作忠可移期捐軀而報國

謝生日賜器幣鞍馬表

析木集辰適及賤生之日細書命使遽推慶賜之仁腆
名物以在門撫孱虛而跼地伏念臣本非國器誤玷宰
司當路妨賢久懷於多懼無功報祿更積於內憂徒依
末光未詒嚴譴斗筭之器既盈而將傾雨露之私有加
而無已於此誕彌之日曲煩齒及之恩咨內府以班常
勅近親以將命永紉文綺發珍筭之兼衣絳革鏤錫解
上閑之良駟攻金之器璀璨織文之幣纖華容莫逮於

報親力非繇於稽古服乘而拜俛仰以兢此蓋伏遇皇
帝陛下謹六聖之典章篤四鄰之體貌德薄而禮之厚
功少而錫之多以尊隆本朝以風勸在位天高地厚莫
知圖報之宜義重命輕更識矢心之所

乞外任表

臣聞事君必盡其誠故當無隱陳力有時而止蓋以不
能輒傾底裏之懷仰瀆高明之鑒伏念臣所學昧陋稟
生拙艱敢希當世之功名徒慕古人之節行逮四朝而

竊仕遭二聖之誤知濫廁羣材遂預初政遷進歷塵於
三省首尾已及於四年不繫去來無能軒輊匪惟智慮
淺而已竭加以憂患多而早衰兩目頻昏百骸多疾遲
徊戀寵出入覲顏內招竊祿之災外坐妨賢之罪與其
待人言而後去上煩典刑不若揣已分以自陳猶全出
處輒傾孤懸願丐一州伏望皇帝陛下廓日月之明廣
乾坤之度矜此已疲之犬馬貸其無補於涓塵特推從
欲之仁不惜分符之寵使有民社宣惠澤而下流庶於

桑榆收微勞以自効

再乞外任表

臣聞不備而惟其人故輔臣必用賢者無功而在其位則詩人所以刺之軌控籲天之誠冀逃累國之責伏念臣越從羈遠擢實顯嚴才不足以達政經學不足以斷國論無嘉猷以副虛佇之託無重望以慰具瞻之心顧慕留連逡巡俯仰雖皇慈之善貸豈清議之所容夫物理之常器滿則必覆古人之戒位高者

疾顛加之多懼而積憂足以早衰而易病外雖強而中涸日常耗而髮童日迫傾危上孤任使再殫螻蟻之志敢避鈇鉞之威伏望皇帝陛下大明燭幽至道成物察臣今日進退之計本無他腸貸臣累年尸素之愆俾全晚節庶幾稍循于禮義以免大玷于生成藩宣倘畀于一州報効敢辭以九隕叩闕俯伏得請是期

再乞外任表

近上封章願辭職任恭承批答尚祕俞音輒再冒於謹
誅非敢輕於出處臣誤膺獎拔本乏器能一預政幾四
更歲籥有妨賢之積愧無事道之顯名每驚弱植之漂
搖常賴至仁之掩覆滿溢必殆盈虛有時非不知聖神
之運難逢天地之恩未報然材智止於如此疎謬見於
已然用之易窮如鼠之五技去不為少若鳧之雙飛况
爵祿者天下之至公難貪而又處進退者人臣之大節
竊冀於少完儻可効於涓埃顧何分於內外伏望皇帝

陛下惻具懇款賜以始終大譴大誨稍歇黜幽之憲有
民有社願膺共治之咨誓將勤養於小民尚得仰酬於
洪造

謝鄆州到任表

上書歸相知政路之固功出守分符荷天仁之從欲仍
以仲連之節臨茲故社之邦內省幸榮曷勝感懼伏念
臣起身一介竊祿四朝比辱使令擢從孤遠初由蓬萊
道山之府載服桂後惠文之冠以橫榻之散郎正中司

之報法無為容於左右不自意其感通遂預政機繼塵
宰枋然而據非其所者危之道技多而短者易以窮空
精銳之生銷曾分毫之未報罪多而功不見誓至而毀
亦隨思其所安去猶有補章哀祈者六七詔敦諭而再
三不求所窮惜東野之御將敗敢釋其位察次孺之辭
以誠祕殿清切以寵其名東方浩大以為之部張良微
志止願得封於留漢帝重恩乃使歸侯於絳以時去國
不日到州示以印章人生榮觀識其城郭心喜來歸既

見一方所部之吏民具道二聖愛人之恩德感嗟頓首
鼓舞瞻天已獲逢白髮之故人又得拜先楸於舊隴書
生之幸仕路幾希此蓋伏遇陛下純仁厚義以康保萬
方至公大明以照臨百辟事最至而有是非之辨人雜
進而識邪正之情使肆慝愚獲全出處臣敢不謹進退
之義厲始終之成子子藩方身雖在外惓惓王室心不
謂遐更期宣化之餘益誓納忠之報

賀南郊禮成表

聖人能饗熙事備成皇矣顧懷隤擁肇禋之福沛然敷
錫肆均大賚之恩恭惟皇帝陛下凝命乾剛重熙離照
西清訪道學緝於光明東朝致恭孝通乎上下以小
毖之心求助以鳧鷖之道守成謂大祀之重五經謹始郊
以見上帝朝薦真館裸告太宮侯長日以道迎肅圓丘
而陟降百神之靈受記諸福之物致祥宣室儲精既逆
釐於三極瑞闡渙號俾作解於羣方仁入有生歡通無
外臣叨蕃宣之任布寬大之書執玉甘泉莫効駿奔之

力馳心魏闕獲同慶賚之私鼓舞昌辰百倍常品

上太皇太后賀表

精意以享昭格天人之休敷錫厥民丕宣雷雨之慶車
書所底蹈舞同榮恭以太皇太后陛下全德在躬大公
御政夏塗山之教化周太姒之勤勞聲氣淵嘿而賞罰
行堂闡天高而夷夏治扶維重器自置於安平擁佑清
躬益躋於聖教吉禮咸秩肇禋告成寒暑正而風雨時
福祿來而菑害去反始報本丕錫福於洪禧蕩垢滌瑕

與更新於庶域有生茂豫嘉氣橫流臣幸守藩方親承
惠澤雲天在望跡類於周南玉帛侍祠心馳於漢時

謝青州到任表

東方大國莫如鄆青愚臣何人繼命帥守莅官茲始揣
已不遑伏念臣器蘊至淺智靈弗競遭會繼明之始越
膺共政之圖三俯空速於六朝千慮蔑聞於一得雖進
退必由其道常願學乎聖人而功烈如此其卑終難收
於士論寬典刑於司敗假丘隴之便藩報政稽期實愧

三年之魯改符易地猶叨四履之齊惟時東秦號一都會士知禮義境控海山厥民富饒少敢攘之舊習其俗舒緩有平易之餘風謹於承流可以無事曾是迂愚之品獲塵寄委之憂此蓋伏遇皇帝陛下乾健而粹純豐中而光大沈機以觀變化定鑑以御妍媸人無遐遺材以器使臣敢不振厲哀境激昂至恩簡禮去煩稍究前修之治推仁宣澤庶求遠俗之安儻集涓微仰酬覆燾乞致仕表

事君主於無隱誠必自通陳力至於不能勢宜知止輒
露引年之請仰祈從欲之仁伏念臣親際盛明蚤塵華
顯文章不足以潤色才業有愧於經綸歷事三朝殆踰
四紀內之清塗嚴闥極侍從之榮外之名城大都徧藩
守之選乏嘉猷以告於后無膏澤之下於民徒以忠義
愚直之心期於弗變至於得失利害之故初不自謀緣
茲誤被於聖知嘗亦預聞於國論士儒至此幸遇已多
比奉對於清閒頗自陳於宸晏出保留宮之鑰坐安喬

木之邦惟厚祿不可以火叨顧良時忽焉而如失年齡
寢邁疾疹交乘神明潰虛難支於外慮筋骸摧蒲頓異
於前時榮敗尚貪福知己過非特招滿盈之禍懼將累
覆疇之恩迫此憂危敢祈引謝伏望皇帝陛下曲矜舊
物深燭至誠貸其無補於涓埃哀此已疲之犬馬許上
還於印綬俾退養於丘園順服經生儻保完於餘喘顧
陪鄉老永歌頌於太平上以成君父始終之仁下以全
臣子進退之節伏望聖慈許臣致仕

第二表

敢期睿眷未賜俞音懼汗雖濡危誠難止伏念臣材質
極陋跡援至孤黃緣三聖之知簡拔衆人之上事功何
有祿位過盈雖愛君之心死然後已而從公之力耄矣
無能向被恩憐許叨居守厲哀殘而振迅不免曠官懷
寵過以留連又將滿歲災釁乘時而或至疾病攻老而
日深形神之勞兩皆敝竭外內之敵紛莫支持臣非不
知聖明之治難逢天地之恩未報迫茲頽朽無以勉強

況今時不乏人物皆遂性自惟出處無所重輕曲煩優
詔之丁寧益重孤忠之感涕伏望皇帝陛下測其底衷
保以始終俾解組以去歸獲全生而退養逍遙漳浦之
卧休息茂陵之居既以免鐘鳴不止之譏又以脫器滿
則傾之禍陶然歌聖樂以自終則於君父之仁豈特立
山之重

第三表

未賜允俞倍深感涕在念舊之恩雖厚顧籲天之願未

從敢漚肺膺再干鈇鉞臣蚤緣一介獲際三朝出入恩
榮周旋幸遇積歲時而徒父曾報稱之茂聞居懷竊位
之慙且困負薪之疾比乘燕見頗嘗懇激於引年貪奉
德音乃復逡巡而就次坐持留鑰入浹歲簞蓑齡益頽
壯氣益耗精竭形疲而莫之復日改月化而益以深疾
相與以侵陵勢無因而勉強偃偃耒路犬馬之力無餘
奄奄餘輝桑榆之期有幾故抗章告老謝病乞骸敢謂
聖度寬大而不忘其愚訓言惻怛而未容其去雖事君

之禮要以承命為恭然陳力有期至於不能則止苟免
貪於厚祿殆自迫於餘生豈獨貪冒以取世譏亦將滿
盈而致陰禍上孤覆燾下喪始終敢竭一誠復申三請
伏望皇帝陛下廓日月之明而幽無不燭推天地之造
而物皆遂生特賜殘年俾還故里奉松楸而躬事完桑
苧以裕生釋去軒裳以消災危之數輔近藥石以冀衰
疾之康儻形神之可支安猷畝以自樂優游老境歌詠

聖辰

謝分司蘄州居住表

伏讀訓示俯循罪跡理不容於萬死恩猶畀其餘生祗
命奔馳悼心隕越伏念臣羈孤無助勤苦自為承家本
出章句之儒所望不過州縣之吏偶緣人之獲預於政
機寢以次遷遂塵於宰席以嬰缶之器而渡江漢以翺
蠕之力而負丘山空竭一心曾無遠慮待罪期月而已
固嘗不勝於人言去國三年於茲終至再煩於朝論勞
惡暴列彈劾交興擢髮不足以數罪辜伏鑽不足以謝

公議敢累好生之德曲推念舊之仁祇令分務於別都
更俾安身於善地咎深謫薄感激涕零此益伏過皇帝
陛下同德昊穹紹休前烈記臣久侍於帷幄憐臣自蹈
於典刑昔常察其所安未忍置之於理如犬馬簪屨之
賤猶弗棄之雖天地父母之慈不過如此臣敢不省非
內訟劾意自新往咎莫追長負誤朝之愧來日無幾尚
堅縻骨之忠

謝新州安置表

上負國恩自干罪憲悔心追悼感涕莫收伏念臣以一
介之微叨四朝之祿當大明之繼照由外服而賜歸歷
塵近司實奉初政心貪榮利久竊位而無慙識闇事幾
日播惡而不悟仰累任人之哲自貽誤國之愆置散投
閒固公言之未厭後咎餘責謂顯戮之必申前蒙異恩
聊復遠斥此蓋伏遇皇帝陛下好生以奉天地任德以
法祖宗載加震曜之威備示存全之澤譬父母之誨其
子或賜矜憐然瘡癘之逼於身何能淹久儻厚德之可

報誓孤忠而弗渝

代張安道南京謝表

天近威顏初違於咫尺地興王業叨任於保釐已見吏
民奉宣恩德戀榮兼甚感愧內并伏念臣奮出諸生馴
致臚仕惟兩朝獎遇寢階文武之崇資雖一節始終初
乏涓塵之小補曩從留務起殿輔藩速歸覲於路朝旋
躋榮於薇省雖時陟降瞻奉於清光曾無謀猷仰禪於
願治屢緣顏晏自丐便安圭符之榮恩方頒於俞命車

服之賜禮特異於故常洪惟別都是謂大國奉藏衣之
原廟謹留鑰之離宮襟帶淮灘左右齊楚當舟車之一
會列府衛之萬兵閭巷熟錦衣之榮兒童習竹馬之舊
歲時足以展先楸之拜恩禮足以交故老之歡內省歆
然其何稱是此蓋伏遇皇帝陛下作新大治總厲庶工
憐臣之於踐更既勞而又察臣之於義利粗識所趨特
示眷懷寵綏優寄敢不殫犬馬之効庶以報乾坤之仁

劄子

辭免監察御史劄子

竊以御史者朝廷綱紀之所在而天下公議之所出居是官者必得博學多識剛明方重之人然後為稱其任如臣諂蘊空疎性智昏塞材亡所長名不著見天聽之過遽此拔任深恐輕累風憲之地而無以厭服天下之望臣實不敢冒處湏至瀝懇辭免伏望聖慈特賜矜宥所有閣門敕命不敢祇受

再辭免監察御史劄子

聞命震恐固知所措竊以臣之事君雖以承命為恭然而不度己之能否貪冒以任事者亦不可謂之忠矣今御史之屬缺員日久天下皆知陛下慎擇精選思得行誼素重可以表率在位之人以充其任而臣既無學術以明考典故又無素望以取信清議一旦出於過聽強之此職其何以副聖君所以用人之意而允中外之望哉伏念近歲以來御史補外者雖一時以言事得罪然其人皆有公忠亮直之節竊謂陛下宜賜召還處以舊

職必能有補以慰天下如臣之愚不敢冒處所以救命
乞行寢罷

辭免御史丞劄子

竊以御史府自近世不置大夫而中丞為之長其職在
肅正朝廷紀綱繩過內外姦枉天下之事無不可論非
夫有德有言剛明厚重臨義理而知所擇者其誰宜居
之臣智疎材下資淺望輕承乏臺端已逾器量雖殫狂
瞽無補毫分日懷失職之憂敢意誤恩之及陛下進臣

名位不若行臣之言加臣寵榮不若使臣無愧况備官之未久實揣分以難安伏望矜察愚衷追寢成命

再辭免御史中丞劄子

臣供職以來為日未久畧無裨益方俟譴訶恩制橫加莫知其故衆人見臣超擢將謂言事有功則恐僥倖生心妄想希効沽激之義傾訐之風爭進紛然卻致多事然則臣雖以能言而進其弊猶且若斯况臣所論之無功乃是當黜而反陟且官為御史本在繩愆苟身冒過

恩何以自信此所以夙夜內省跼蹐靡遑上繫朝廷懲
勸之方下繫臣子進退之分

辭免魚侍讀劄子

伏念臣孤拙不肖自待罪中執法夙夜憂畏志慮耗竭
長恐顛仆孤奉恩獎今復寘之經筵豈敢當此恭以皇
帝陛下春秋富盛嚮意經術講讀輔導正在得人而儒
學之士布滿近列猥以屬臣實非其稱伏望追還成命
非獨下副公議而使臣安分畢力以守職事獲逃咎責

則陛下賜臣厚矣

再辭免兼侍讀劄子

仰戴寵遇懼不自勝理有未安義難苟止方陛下嗣服之始儲意經藝將以尊所聞而極高明凡在帷幄左右之臣宜皆博訪宿儒以極天下之選而臣素無資格德義不聞此臣揣分而不敢受也又臣自去冬初備臺職首曾言講讀臣僚宜慎擇經術之人當時頗蒙采納今若冒榮濫處則是前日之言臣自以為已實能堪之此

又臣畏議而不敢當也伏望察臣區區非有飾說特賜
寢罷

辭免尚書右丞劄子

恭聞寵命驚隕失次伏念臣淺聞寡識無所肖似昨蒙
召自孤外任以風憲愧無古人正色獻替之效莫副陛
下虛已聽納之公覲顏尸官日俟罪譴敢冀誤寵擢寘
近司今二轄之官為四輔之任用人當否繫國重輕况
舊德老成布在要近其聞望皆出臣之右其踐歷皆在

臣之前舍而不求乃在虛受苟輒冒處必致顛危伏望
追寢以安愚分

再辭免尚書右丞劄子

天聽甚高愚誠不達典頒訓敕益用震惶臣竊以士平
居時常歎無位以行其道臣今幸仁聖在上好善求材
長短畢用遭遇斯時而擢於可為之地自人情觀之宜
若可以奮迅而進也臣所以逡巡不敢受者蓋逢時愛
日雖當汲汲而審已揆分又有義存焉臣愚而多艱或

可以小用不可以大受苟力不能自量學未能自信而遽務謀猷國事是所謂苟得者其於國體為累甚大臣一身顛仆安足道哉伏念中執法其任已重常憂不勝今願得因此并解言責別除一閭局庶可以自効伏望察其誠心哀而憐之

再辭免尚書右丞劄子

使車光華里閨榮歎拜制詞之深厚聽口敕之丁寧思渥有加兢慙無地臣非敢偽為廉退以邀譽於流俗亦

非肯故自違慢以干誅於憲典實以陛下今日之勢於
左右政事之臣必當純用德望乃可以重朝廷而鎮羣
下臣材質薦下自度不可大任故不避再三稽命之戮
實愧玷聖明知人之鑒伏望追罷恩制改任賢傑庶允
公議以全螻蟻之命伏聞御史中丞已差人訖敢乞別
賜一差遣亦足以自効

辭免中書侍郎劄子

伏念臣出於孤平驟遭識拔備員省轄漫已逾年雖矢

心畢力圖報萬分而畧無善狀日俟嚴譴方欲自為投
劾之請豈敢更冒遷次之榮况中書之地幾政所出其
所付任尤須得人臣自揣量實難稱副

辭免門下侍郎劄子

臣才質空陋久玷近列徒以國恩未報不敢引身退避
而累蒙遷擢職位愈高退自揣量實不遑處况東臺出
納制命其任尤重伏望察臣不逮收寢新命以允公議

忠肅集卷二

欽定四庫全書

忠肅集卷三

宋 劉摯 撰

奏議

乞結絕亳州獄奏

臣伏見亳州官吏昨以往滯俵散青苗本錢朝旨下本
路轉運司差官取勘及今累月尚未結絕訪聞命官及
干繫人等在禁者其數甚衆遂成大獄驚駭物聽臣愚

以謂本州官吏所犯止于不依限支散青苗錢其罪可
以一言而定非有晦隱難窮之狀而起獄不止有司未
測朝廷風旨張皇事勢連逮證佐當此暑月追呼淹繫
殊可矜恤欲望陛下連降指揮嚴責勘司湏令日近完
結其證佐人逐旋先次疎放所貴盛夏不至淹延取進
止

論役奏

臣伏見近日有畿縣百姓數百人就宰相居第告助役

新法不便及詣開封府山頭又赴御史臺陳訴稱係東
民稅戶今來令出錢助役各係貧戶生業微薄每年賦
稅并諸色官債已是供輸不前難于更出助役錢數及
稱提點司升起逐戶等第已蒙曉示起納期限數百人
往來街市京師喧然臣竊以畿甸者天下根本之地常
宜安輯之而愛養其財力使有豐佚閒暇之樂故可與
為善而不可與為非義所以重都下根本之勢昨者團
結保甲是時西邊用兵法令一出民間驚駭至今憂惑

而未寧今又作法使人均出緡錢非時升立戶等期會
急迫所以人情惶駭無所赴懇恐非所以強幹內重愛
人寬役之意實由有司未能奉宣陛下大均之意以立
法度乃為此等紛擾臣伏願先降指揮告示逐縣今來
新法未得施行別聽朝旨以安衆心然後乞根究昨來
承准是何條制輒有升降戶等及如何出榜依理施行
所在役法臣愚欲望陛下深求民情博采中外之論再
行講求其要不至重斂動衆而可以經久者而後行之

繫民休戚此最大難惟陛下謹慮而審取之天下幸甚

貼黃

臣聞王庭老張靚將兩浙差役合用錢數增起一倍
科在民間本路人情嗟怨不安今來府文又敢擅升
戶等此等皆是妄意朝廷欲以羨餘為功臣竊慮諸
路亦有似此擅升等第多配役錢去處乞速降指揮
嚴為約束

論用人疏

君子小人之分在義利而已小人才非不足用特心之所向不在于義故希賞之志每在事先奉公之心每在私後陛下有勸農之意今變而為煩擾陛下有均役之意今倚而為聚歛其有愛君之心憂國之意皆無以容于其間今天下有喜于敢為有樂于無事彼以此為流俗此以彼為亂常畏義者以進取為可耻嗜利者以守道為無能此風寢成漢唐黨禍必起矣惟君子為能通天下之志臣願陛下虛心平聽審察好惡前日意以為

是者今更察其非前日意以為短者今更用其長稍抑
虛夸輕偽志迫忘遠韋于苟合之人漸察忠厚慎重難
進易退可與有為之士收過與不及之俗使會于大中

之道則施設變化惟陛下號令之而已

案本傳摯為監察御史時入見

神宗面賜褒諭因問摯從王安石學耶安石極稱器識
摯對以少孤獨學不識安石退而上此疏今永樂大典
本闕謹據
宋史補入

論助役十害疏

臣聞孟子曰徒善不足以為政言人君雖有仁心仁聞

苟不因先王之道為良法度以行之亦不免于民不得
被其澤恭惟陛下至誠好治憂念元元謂天下役法久
失其平故慨然有意其大均之也然有司建議立法頗
無以上副詔旨而下協人情者臣請言之其法曰率錢
助役官自雇人臣謂其勢有不可勝言而畧陳其害天
下戶籍均為五等然十七路三百餘州軍千二百餘縣
凡人之虛實役之重輕類皆不同今歛錢用等以為率
則所謂不同者非一法之所能齊若隨其田業腴瘠因

其所宜一州一縣一鄉一家各自立法則紛錯散殊何
所總統非所謂畫一者其害一也新法患舊籍之不得
其實故令品量物力別立等第以定錢數然舊籍既不
可信則品物品量何以得其無失不獨搔擾生弊亦使
富者或輸少貧者或輸多其害二也上戶常少中下之
戶常多上戶之役數而重故或以今之助錢為幸中戶
之役簡而輕下戶役所不及故皆以今之助錢為不幸
優富苦貧非法之意其害三也新法所以令品量立等

不取舊簿者意欲多得雇錢而患上戶之寡故臨時登
降升補高等以充足配錢之數疲匱之人何以堪命近
日府界其事已驗其害四也歲有豐凶而役人有定數
助不可闕則是助錢非若賦稅有倚閭減放之期其害
五也夏秋二熟農人惟有絲絹麥粟之類而助法欲用
現錢故須隨時貨易逼于期會價必大賤借使許令
以物代錢亦復有退揀壅塞及黃緣乞索之患其害
六也兩稅及科買貸債色目已多使常無凶災猶病不能

又起庸錢竭其所有恐斯人無悅而願為農者天下戶口日當耗失則去為商賈為客戶為惰游或父母兄弟不相保抵冒法禁折而入下戶大而聚而為盜賊其害七也徼倖之人又能夤緣法意虛收大計如近日兩浙科起一倍錢數欲自以為功而使國家受聚斂之譴其害八也夫既為之民而服役于公家迺所謂治于人者事人天下之通義也況鄉縣定差循環相代上等大役至速者猶須十餘年而一及之至于下役則動須一二

十年乃復一差今使聚出緡錢官自召雇蓋雇之之直
不重則不足以募不輕則不足以給輕之則法或不行
重之則民不堪命其害九也夫役人必用鄉戶蓋以其
有常產則必知于自重性愚實則罕至于欺公舊法雖
有替名鄉人自任其責今既雇募恐止得輕猾浮浪奸
偽之人則所謂帑庾場務綱運凡所以生財者不惟不
盡心于幹守亦恐縣官之物不勝其盜用而抵冒法令
罪獄日報至于弓手耆壯承符散從手力胥力之類職

在捕察盜賊發行文書追督公事者則恐遇寇有畏逸之患因事有騷擾之奸而舞文鬻無日有虛偽其害十也夫民可安而不可動財可通而不可竭以臣之淺聞寡見而所列如此其沸于民口有大于此而臣未敢有言者其又何窮然臣嘗為陛下博訪而深計之蓋天下差役莫重于衙前今司農新法一項云鄉戶衙前更不抽差其長民人等並聽依舊將天下官自出賣到酒稅坊場并州縣坊郭一戶助役錢數以酬其重難臣謂此

法有若可行然坊郭一等戶自來已是承應官中配價之物及饑饉盜賊河防城壘緩急科率郡縣賴之今亦難為使之均出助錢外舊來官中將場務給與市前對折役過分數然多是估價不盡虧卻官中實數今既官自拍收用私價召賣則所入固多又應係衙前當役去處事件官為裁省使無舊日糜費而支酬之際稍優其數則人情必當樂為可寬鄉戶重役而似無害民之事臣乞陛下將此一法詔有司講求其詳逐路坊場錢戶

可以了得本路召雇衙前酬獎則詳其條目行而觀之
以二三年間若見其利則其他役法更革無難矣所在
助錢之法伏望早賜睿斷一切寢議以幸天下夫更令
創制可以漸而不可以暴況欲內自畿甸外至海隅一
槩率錢可謂重歛又欲迫急而成之使生靈不得以自
全陛下安得不慎重其事哉

論助役法分析疏

臣近曾上言論助役之法其害有十今奉聖旨批送下

司農寺曾布劄一條件詰難奉聖旨令臣分析者竊以助役之法有大臣主之于中書有中書之屬官及御史知畫者講畫于司農寺有大寺所選擇監司舉官官行之于諸路上下布置其勢若此可謂易行矣然曠日彌年未有定論可以為法者其故何也不順乎民心而已矣民之所不欲古今未有可以勢力強而成者也故雖命使者奔馳道路稟之于內而劫之于外然其擬議參差條制殊異衆情紛然不知其可行之計則此法利害

明若觀火矣臣有言責故前日采中外士民之說敷告于陛下今司農之辯說既如此陛下以臣言為是耶則事盡于前奏可以覆視陛下以臣言為非耶則貶黜之而已雖復使臣言之亦不過所謂十害者不惟費辭文過煩紊天聽而風憲之官豈與有司較是非勝負交口相置如市人之交競者則無乃辱陛下耳目之任哉有司謂臣等險詖欺誕則上有陛下之聽察而下有中外之公議所謂中外向背則臣所向者公所背者私所向

者義所背者利所向者君父所背者權臣今方辯助法之利害而無故立向背之論以朋黨之意教誘天下此可駭也所謂曾無忌憚則陛下之法臣所畏也陛下容受忠直臣為御史實不敢隱情自為忌諱今司農欲使臣畏忌權臣則誠臣之所不能者也伏望陛下將臣前後所論助役章奏與司農之言宣示二府大臣中外百官以致是非若臣言有所取乞速罷之奏議以安天下之心若稍有欺罔則乞重行竄逐以謝專權之人而戒

妄言者

分析第二疏

臣昨日准聖旨批下司農曾布劄子為詰臣所言助役事尋已具分析奏聞去訖臣竊以耳目之于人事物過者必見必聞以赴其心而心必受之未有不信其耳目而反以其能視聽為疑者先王以言置官代天下耳目內外相信無以異于一體之相為用也其言雖直必容雖多必受則國家安治不然則反此故謗木諫鼓不

設危亂之國鼎鑊斧鑕不在聖明之朝恭以陛下躬上
聖之德好問樂善凡延見臣下雖賤官小吏必溫恭和
容以訪逮之比堯舜之盛也然至于臣等以職事為言
則使之分析者中外皆知非陛下意乃司農挾寵以護
改作大臣設法以蔽聰明爾因事獻忠敢一言之今天
下之勢陛下以為安耶治耶抑未耶苟以為未安未治
也則以陛下之睿智言動起居躬蹈德禮夙夜厲精以
親庶政而天下未至於安治者將誰致之耶陛下即位

以來注意責成以倚望太平而日以太平為已任得君
專政安石是也二三年間開闢動搖舉天地之內無一
民一物得安其所者蓋自青苗之議起而天下始有聚
歛之疑青苗之議未竟而均輸之法行均輸之法方擾
而邊鄙之謀動邊鄙之禍未艾而漳河之役作漳河之
害未平而助役之事興其間又求水利也則民勞而無
功又鑿淤田也則廢大而不效又省州縣也則諸路莫
不強民以應令又起東西府也則大困財力禁門之側

斧斤不絕者將一年而未已其議財也則商賈市井屠
販之人皆召而登政事其徵利也則下至于歷年日而
官自鬻之推此而往不可究言古之賢人事君行道必
馴致之有漸持久而後成至于設施皆有次序今數十
百事交舉並作欲以歲月變化天下使者旁午牽合于
州縣小人挾附佐佑于中外至于輕用名器混淆賢否
忠厚老成者擯之為無能俠少儇辨者取之為可用守
道憂國者謂之流俗敗常鑿民者謂之通變能附已者

不次而進之曰吾方擢才不可招者為名而斥之曰吾
方行法凡政府謀議所以措置經畫除用進退獨與一
屬掾曾布者論定然後落筆同列預聞乃在布後故奔
走丐乞者布門如市雖然猶有繫國家之體而大于此
者祖宗累朝之舊臣則鐫刻鄙棄去者殆盡國家百姓
之成法則剷除廢亂存者無幾天下所謂賢士大夫此
歲相引而去者凡幾人矣陛下亦嘗察此乎去舊臣則
勢位無有軋已者而權可保也去異已者則凡要路皆

可以用門下之人也去舊法則曰今所以治馭天下者是已之所為而陛下必將久任以聽其伸縮也嗟夫此事之實也其名則曰革弊而興治是以陛下樂聞其名而難察其實也夫賞罰號令乃陛下所以砥礪天下而鼓動四方以為勸信者今有人焉能舞公事以傾勲舊能興大獄以逐官吏其事是耶乃其職爾何至起任以為職司耶趙濟是也又有人焉以渭南欺罔之始既以此得罪而終始以此增秩王韶是也程昉事漳水以興

大役困一方而無成功趙子幾挾情以違法禁按史以防民言則皆置而不問乃是賞反施于聖人之所當罰罰不及于王法之所當誅也畿邑之民以助錢為訴也陛下聖旨令召情願東明知縣以不能禁民有訴而被劾也陛下聖旨止令劾擅升戶等之事二者皆獨斷之善政而中書皆格而不下此則陛下之號令不行也西師無功而曰非朝廷之本謀天下但見給軍之費輦出于京師空名之語馳下于西路又命一知制誥于將幕

使專代天下之言報復號令絡繹于道苟以為非耶何
不止之迨其事敗則曰非政府謀也捐費緡錢以千萬
計秦晉之人肝腦塗地日增軍士之怨結邊疆之釁而
不自謀咎乃致陛下發中詔以責躬抑徽號而不受忠
義之士誰不痛心而疾首至如助役之法臣嘗言之矣
其條制纖悉臣雖未能究見然終以為使天下百姓賦
稅貸債公私息利之外無故作法升進戶等使之驟出
緡錢皆非為人父母愛養基本之所宜為者故臣謂之

聚斂非妄言也陛下任遇輔臣如此其重而致主之術
乃用此道是皆大臣之誤陛下而大臣所誤者誤諸臣
也今既顛謬乖錯敗亂綱紀知天下之不容懼宸衷之
回悟以謂雖中外之士畏避無敢言者然其尚敢言者
獨御史有職爾故又使司農熒惑天聽作為偏辭令臣
等分析以摧沮風憲之體艱梗言路欲其憂懼苟容而
緘默或欲撿其危言從而擠逐不知忠臣節士雖戮辱
不懼所以盡事君之義爾今羌夷之款未入反側之兵

未安三邊瘡痍疲潰未瘳河北大旱諸路大水民困財
力縣官匱竭聖君恭勤思治萬方之所知而在輔弼者
方欲蔽天聰明使下情不得而上達其何心耶臣願陛
下思祖宗基業之艱難念天下生靈之危苦少回幾慮
收還威柄深恐異時專權肆志將有陛下所不能堪者
則必至于虧失臣君之恩是今日養之適所以害之也
若夫馮京王珪同列預政皆依違自固不扶顛危雖心
悟其非而無所裒正已之進退又嬖姁而不決皆非所

謂輔臣之體臣四海之內孤立獨進陛下過聽任以風
憲嘗竊思之近歲臺諫官疊以言事罷免豈其言皆無
補于事歟豈皆願為訐激險直之語以自為名而去歟
嘗以為欲言政府之事者其譬如治湍暴之水可以循
理而漸導之不可以隄防激闕而發其怒不惟難為功
亦為患滋大故臣自就職以來竊慕君子之中道欲其
言直而不違于理辭順而不屈其志庶幾愚衷少悟天
聽而亦不敢倖倖然如賤丈夫以一言一事輕決去就

致聖朝數數逐去言事而無所裨補思以上全國家體而下亦能久其職業而成功名兩月之間纔十餘疏其言及助法者止三疏耳當天下多事之時而臣言簡緩又不足以感悟則其負陛下亦多矣不意大臣之怒已至如此令臣等分析分析之事前代無之祖宗無之近年已來乃為此法以摧言者之氣方陛下孜孜聽治嘉于納諫而大臣所為則不得正目而視此所以發臣之狂言而不能默也伏願陛下深察其事物之變安靖之

治以休生民有所措置以大小緩急為先後之序以義利經權為本末之辨自茲凡有獻替于陛下者乞有以誘掖獎厲之罷分析之命以尊嚴朝廷而養多士敢言之氣臣不勝惓惓憤懣愛君待罪之至

代留守張方平留闕伯微子張許三廟奏

伏見司農寺奏請降制應天下祠廟並依坊場河渡例召人承買狀取淨利本府管下所管祠廟五十餘處各已施行內有闕伯宋公微子廟闕伯廟歲納錢四十六

貫微子廟十三貫並三年為一畧臣竊以開伯遠自唐
堯遷此商丘之地主祀大火而火為國家盛德所乘而
王本廟歷世尊為大祀微子宋之始封君開國于此亦
為本朝受命建號所因載之祀典垂之甲令所當虔潔
以時奉祀又有雙廟乃是唐張巡許遠以孤城死賊所
謂能捍大患有功于民者今既許承買日後小人以利
為事必于其間營求招聚紛雜冗褻何所不至慢神瀆
祀莫此為甚歲收甚微實損大體其餘利害不敢盡言

欲乞朝廷詳酌留此三廟特免出賣以稱國家寅恭典祀崇尚前烈之志

乞慎擇講讀官奏

臣竊以聖人之德其聰睿神智固天性之所自有然孔子曰吾非生而知之好古敏以求之者也孟子亦謂人皆有四端是猶火之始然泉之始達在乎充之而已苟不充之將失其本然之性則雖聖人方其始也學問以達之範圍以成之者其可少哉昔有周成王幼沖踐阼

其師保之臣傳之德誼道之教訓者周公召公太公其人也夫左右之人既如此則成王雖幼其耳目所入蓋無有不正者矣我仁宗之初亦以盛年嗣服用李維桢殊為侍讀馮元孫奭為侍講惟茲數人皆名儒宿德極天下之選是時方親庶政聽斷之暇每于雙日召使入侍講說經典或讀祖宗故事盛明之政慶澤無窮恭惟皇帝陛下紹膺天命傳序統命夫以異稟之資夙成之善而又上有太皇太后陛下之至仁厚德保護開祐所

以成就者罔不備至矣然方春秋鼎盛在所資養左右
前後宜正人與居語默見聞宜正事是接所以起善養
源保徵慎始尊德美而長智習致廣大而熙光明則勸
講進讀輔道之官其可不慎擇也哉伏見兼侍講給事
中陸佃蔡卞皆新進少年越次暴起論德業則未試語
分望則素輕使在此官衆謂不宜伏請罷其兼職以允
公議仍欲望聖慈于內外兩制以上官內別選通經術
有行義忠信孝弟淳茂老成之人以充其任過非聽政

之日便殿燕坐時賜廷對使之執經誦說陳天下之義
理古今君臣父子之道以廣膚志仰副繼善求治之意
臣不勝愚款取進止

請依程頤所乞奏

臣伏覩制命以布衣程頤為通直郎崇政殿說書者恭
以尊儒重道振舉遺逸使天下歸心固聖朝之所宜為
也然臣竊惟進退者臣子之大節爵祿者天下之公心
進退不失其義則人道立爵祿不輕所與則士心勸二

者蓋不可不慎也。頤始則節行自守，陛下高其風，故以州推官、西京教授起之。頤既力辭，從而赴召，而陛下又以宣德郎、祕書省校書郎待之。頤既至，未即受命，而陛下又賜之廷對，官之以通籍，置之於經筵。蓋頤之遜避不已，而陛下恩命每有加焉。臣恐頤于出處辭受之際，義有難安者也。孔子曰：「如有所譽，其有所試矣。」孟子曰：「仕有時乎為貧，辭尊居卑，辭富居貧。頤好學求志，有君子之行，遭際盛世，其心豈徒欲以聲名自售哉？固願有

所未就也。頤親老家貧，兄顥有賢行，官不達而死。在頤之義當仕也。為貧而仕，則若孟子所謂居卑者可也。今有譽而不試，每辭而加進，臣于是知頤之不敢受也。若夫紛紛之論，致疑于頤者，非獨如臣之言也。直以謂自古以來，先生處士皆盜虛名，無益于用。若頤者，特以迂闊之學，邀君索價而已。天下節義之士，樂道不出，如頤等輩，蓋亦不少。彼無所援乎上，故不聞爾。又以謂頤辭免爵命之日，曰：「前朝召舉布衣，故事具在。」是頤之志欲

為仕之常秩而亟欲得臺諫侍從者爾臣固知論者之
或過也然而是非疑似陛下亦不可以不察也聖人自
有中道過之則偏天下自有常理背之則亂伏望陛下
審真偽重名器聞頤方辭恩制乞降指揮依頤所乞成
就其節止授以初命之官既使得以祿養其親又使授
之有義免于似是之謗後日見其可用而進擢之蓋未
晚也于陛下尊德舉賢之道無過不及者不亦休哉取
進止

貼黃

聞頤有所建請數事如欲令經筵侍臣坐講之類又有非所宜言者衆傳以為笑不知有是事乎惟望速降聖旨依頤辭免但命之以初官試之以西京教授庶幾成頤之志完頤之節以息羣議而亦不害異日擢用也夫廉恥不立于天下久矣今幸而有一人焉若授受不當于義則使天下靡然益不以廉恥為事豈不重哉

乞增諫員及許察官言奏事

臣蒙恩過聽使備員御史固將竭盡愚論知無不及而竊惟陛下即昨聽政之始其所先者宜莫若廣言路故臣今就職之日首獻其說蓋聖人以一心御萬事而無遺慮以一視周四海而無遺照非能身親而目得之也為能資諏訪度致之人言開闢其塗使無壅蔽上之公卿大夫百執事下之雖工賸執技之賤芻蕘負薪之陋皆得輸意自竭雖然至前而聽吾之所擇惟懼乎言者

之不能如祖宗以來諫官御史張設員品罕不備足凡
在職者皆有言之責臣今伏見計官止大夫官一員御
史臺自中丞而下雖十員然止于中丞侍御史兩殿中
法得言事外監察御史六員專于察治官司公事文事
之稽違者而不預于言則是在朝廷以一言官而任其
責者裁此五人而已天下之大臣工之衆權強之漸朋
比之萌民之休戚政之利病其于獻納伺察誠恐耳目
之未廣事或有不得盡聞于聖聰者此非帝王明四目

達四聰開衆正屈羣策者也臣欲于諫院增置諫官數員本臺監察御史並許言事其所領察耳目不廢如故所貴共盡忠力交輔聖政臣不勝惓惓取進止

依旨推擇監察御史奏

准尚書省劄子節文臣僚上言近降指揮御史臺察官並許言事臺官共置六員則在臺八員之中當減二員莫若指揮長貳察視本臺除言事官外某可使者某可罷奉聖旨依奏續准尚書省劄子朝散郎試御史中丞

黃履奏現今監察御史六員除劉拯外其五人並係臣
論薦伏念臣既嘗稱其材以進之又擇其不材而退之
在臣私義實恐未安欲望聖慈指揮止令侍御史劉某
推擇奉聖旨依奏並劄付臣者右謹件如前臣契勘本
臺監察御史六員舊來專領察接近制並許言事逐官
皆係臣僚保薦堪充御史之人今除陳次升一人現今
奉使差出臣未之職外有劉拯安惇二員劉任久次可
以減罷伏望聖慈量才別加任使其餘合依近降朝旨

指揮施行

乞依舊令封駁司關報差除奏

檢會准元豐五年五月七日門下省劄子門下省奏據
給事中廳狀封駁房勘會昨會封駁司准元豐五年七
月十八日中書劄子節文御史中丞李定狀奏乞應有
差除並令封駁司限當日關報本臺奉聖旨依奉續准
當年九月二日中書劄子節文同知諫院蔡卞奏乞應
有差除及改更事件並令封駁司抄錄關報奉聖旨應

差除及改更事件到封駁司者並令抄錄關報者勘會
近准新制撥封駁司歸門下省為封駁房其舊封駁司
准朝旨廢罷又准官制新條諫院已廢諫官係中書門
下官外即不言舊條合與不合行使所有本房承受差
除及改更事件今來未敢依舊關報亦未敢便行住關
白帖子稱如合依舊關報未審以何司存為名如以本
房緣以諫門下省若以本省又恐內省無關報外司之
理及檢會式令即無門下省關牒外司條式奉聖旨更

不關報臣竊以朝廷慎于出令故使官司更為檢察內之則門下待以封駁外之則臺諫許其論列然朝省之上事有漏泄禁罪不輕人誰敢傳若非門下以司關移則臺諫所聞常在命令已行之後此定與卞之所以有請而先帝所以從之也其後給事中徒以封駁改司為房人疑內省不敢關報外司遂作申稟致有續降指揮釐革今來惟是敕命已至六曹已作奉行方始隨事關報苟理有未安給事中失于駁正或雖駁而失當其差

除之告命政令改更之制往往已授受施行矣而臺諫
官方從其後論之雖以聖慈優容聽納必無難于追改
若或者以為號令已行不可反汗則是雖設之官而無
補于事也故臣愚欲乞且用元豐三年指揮凡差除及
改更事件並令門下封駁官依舊于當日關報諫官御
史臺所貴成命未下先事裨補而朝廷亦易于施行

貼黃

封駁司改為房名號雖亦小異而事任不殊若謂不

可用關恐合以給事中移牒逐處乞詳酌

乞令臺諫先次上殿奏

臣昨于十一月十日曾具狀奏乞先次令言事官上殿不蒙施行後來竊聞恐候開年降指揮以此不敢頻有申請今來已是歲盡伏望早賜聖旨先次許令臺諫官上殿奏事所貴公議人情不至隔塞得以詳悉開陳上達天聽

論三省樞密院差除奏

臣准吏部牒十月十六日三省樞密院同奉聖旨唐淑問除左司諫等事又牒十月二十八日三省樞密院同奉聖旨陸佃等罷侍講事臣竊睹自來朝制及近降官制格凡差除有中書進擬者有樞密院者有三省者有三省樞密院同進者蓋建官分職各有所治法無相參也三省樞密院同取旨者似止于差除帥臣邊鎮大吏內臣近上差遣而已今來差諫官罷侍講不識樞密何為而預也外言籍籍皆以三省容縱密院侵紊政體莫

不疑異臣竊以國家所可恃者在綱紀大臣所宜守者在名分綱紀正于上則下無邪志名分治于下則政無多門一有奪移何患不起况朝廷今日正當尊強君道謹守祖宗法制嚴臣下之分以消壓權僭之心今廢置官吏陛下大政而三省之事也樞密院非其職逾法出位橫造議論公然犯分臣恐積微至著交亂官守漸行私意以害政事上則陞廉之等慢下則傾奪之患生杜漸防微實繫國體望聖慈特降諭旨戒諭三省樞密

院臣僚凡以差除擬進者各依自來條制班次取旨所貴正名定分事無侵逾以尊朝廷以正在位取進止

貼黃

臣又慮上件差除諫官等事曾降聖旨特許樞密院同進備有特旨乃是聖恩優禮報政欲合同衆論之意而大臣之節自當引義辭免惜朝廷綱紀以安分守不應乘便冒進漸隳失體制

忠肅集卷三